



Notat

Til: Fylkesutvalet, møte 20. juni

Frå: Fylkesrådmannen

Forvaltningsrevisjon - arkiv og offentlegheit - reglar og prosedyrar for lukking av møte i folkevalde organ

Fylkesrådmannen viser til fylkestinget sitt vedtak i sak 15/17 om forvaltningsrevisjon av arkiv og offentlegheit.

Vedtaket pkt. 2, bokstav b), ix, lyder slik:

«Fylkestinget ber fylkesrådmannen følgje opp rapporten slik: Vurdere tiltak for å sikre at reglane og prosedyrane for lukking av politiske møte vert utfyllande og tydelege, samt gjort kjende blant dei folkevalde, t.d. gjennom tilbod om ytterlegare opplæring.»

I møte i kontrollutvalet 28.02.18, sak 1/18, handsama utvalet fylkesrådmannen si oppfølging av fylkestinget sitt vedtak. Utvalet gjorde slikt vedtak i pkt. 2:

«Utvalet ber om at prosedyre for lukking av politiske møte vert utfyllande og tydelege i tråd med vedtak punkt 2b, ix, i form av skriftleg tilbakemelding innan 13.05.2018.»

Fylkesrådmannen har ut frå dette utarbeidd «Reglar og prosedyrar for lukking av møte i folkevalde organ». Kontrollutvalet fekk seg førelagt reglane og prosedyrane i møte 22.05.18, sak 26/18. Utvalet gjorde slikt vedtak:

«Kontrollutvalet seier seg nøgd med det som kjem fram i tilbakemeldinga frå fylkesrådmannen når det gjeld oppfølging av forvaltningsrevisjon av arkiv og offentlegheit og seier seg ferdig med saka.»

Her følgjer til orientering «Reglar og prosedyrar for lukking av møte i folkevalde organ», som fylkesrådmannen vil leggje som vedlegg til reglementet for fylkestinget og reglementet for sakshandsaming i politiske utval:

Reglar og prosedyrar for lukking av møte i folkevalde organ

I. Rettsreglar:

1. Hovudregelen er at alle har rett til å vere til stades i møte i folkevalde organ, jf. kommunelova § 31, nr. 1.
2. Eit folkevald organ skal vedta å lukke møtet når det føreligg lovbestemd teieplikt ved handsaminga av ei sak, jf. kommunelova § 31, nr. 2. Retten og plikta til å lukke møtet

omfattar berre den delen av debatten/orienteringa som omhandlar opplysningar underlagde teieplikt.

3. Eit folkevald organ skal vedta å lukke møtet når det skal handsame ei sak som vedkjem ein arbeidstakar sine tenestlege forhold, jf. kommunelova § 31, nr. 3.
4. Eit folkevald organ kan vedta å lukke møtet når omsynet til personvern tilseier det, jf. kommunelova § 31, nr. 4.
5. Eit folkevald organ kan vedta å lukke møtet når omsynet til tungtvegande offentlege interesser tilseier det og det vil kome fram opplysningar i møtet som kunne ha vore unnatekne offentlig innsyn etter offentleglova dersom dei hadde stått i eit dokument, jf. kommunelova § 31, nr. 5.

II. Rutinar:

1. Eit krav eller ein førespurnad om lukking av møtet kan fremjast av ein av dei møtande medlemene i organet, fylkesrådmannen eller den som møter på hans vegner.
2. Organet vurderer om møtet skal eller bør lukkast. Debatten om lukking av møtet skal haldast i lukka møte dersom møteleiaren eller fleirtalet i organet krev det. Avrøystinga skal skje i ope møte.
3. Dersom organet vedtek å lukke møtet, skal avgjerda og heimelen for avgjerda protokollerast i møteboka. Dersom organet etter debatt og avrøysting som nemnd over i pkt. 2, vedtek at møtet *ikkje* skal lukkast, skal dette protokollerast i møteboka.
4. At møtet vert lukka, inneber at utanom dei møtande folkevalde, er det berre fylkesordføraren eller vedkomande sin representant, fylkesrådmannen eller vedkomande sin representant, kontrollutvalet, kontrollutvalssekretariatet og revisor som har rett til å vere til stades. Andre kan få løyve av organet til å vere til stades dersom det er føremålstenleg av omsyn til oppfølginga av saka.
5. Ei avgjerd om å lukke møtet skal protokollerast om lag slik i møteboka:
«X-utvalet vedtok (eventuelt med tal røyster) å lukke dørene under handsaminga av sak nr. xx/xx, jf. kommunelova § 31, nr. x, (jf. offentleglova § xx).»